

I runga i ngā mahi a NZQA me ngā kōrero i puta i tēnei o ngā hui, kua wehea kia toru ngā wāhanga matua o ngā mahi whakamāori, ā, anei e whai ake nei ngā āhuatanga o tēnā, o tēnā, o aua wāhanga e toru.

Ko te ao mātanga te wāhanga tuatahi, ā, ko ngā mahi whakamāori o tēnei wāhanga, ko te whakamāori i ngā kōrero o te ao pūtaiao/hangarau, o te ao ture, o te ao o te rata me ōna rongoā, o te ao o te kāwanatanga, o te whakapono me te ao tākaro.

I te wāhanga tuarua, ka uru atu ēnei momo whakamāori katoa, arā, ko te whakamāori i ngā momo mātārere katoa, i ngā rauemi katoa o te ao mātauranga, me ngā momo tuhinga kōrero o te rā pēnei i te tuhi reta a tētahi whakahaere ki tētahi atu.

I te wāhanga tuatoru, ko ngā mahi ka taka mai ki raro i ēnei mahi whakamāori, ko ērā kōrero e pā ana ki ngā momo ruri/waiata katoa, ki ngā momo pakimaero katoa, ki ngā momo kōrero whakaari katoa, tae atu ki ngā kōrero o te reo irirangi, o te ao kiriata me te pouaka whakaata.

Kei ngā paerewa nei anō ngā kōrero e whakaatu ana i ngā takahanga hei takahi mā te tangata inā tahuri ana ki te whakamāori kōrero. I tēnei wā ko ēnei e whai ake nei.

1. Me āta whakatau mēnā ka taea e koe te whakamāori, kāore rānei; (*Kāore he hua o te whakataruna ka taea e koe. Ki te kore, ana, kua kore*)
2. Me whakapā atu ki te kiritaki kia mōhiotia te pūtake me te whakataunga atu o ngā kōrero e whakamāoritia ana, me te roa o te wā hei whakaoti; (*Ko te mea nui i tēnei o ngā mahi ko te āta whakatau ko wai te hunga ka pānui i tāu i whakamāori ai*)
3. Me noho tikanga-ā-iwi; (*He take nui tonu tēnei i te mea, he reo kē, he tikanga kē*)
4. Me noho pūmau ki te whanonga tika; (*Ka roa tonu pea tēnei takahanga e wānangatia ana i te mea he nui tonu ngā raruraru ka ara ake i roto i ngā mahi whakamāori pēnei i te pātai, 'Inā mutu ana te whakamāori i ētahi kōrero, nō wai ngā whakaaro i roto i ngā kōrero kua whakamāoritia. Nō te kaituhi o ngā kōrero i whakamāoritia, no te kaiwhakamāori rānei?'*)

E mōhio ana tātou katoa he pātai pai tēnei, ka mutu, arā noa atu ēnei momo pātai ka whakaarohia ake e te tangata i roto i ngā mahi whakamāori)

5. Kua whakatikatika ki te whakamāori; (*He papa kupu, he rangahau, he aha noa iho e oti pai ai te mahi*)
6. Ko te tauira tuatahi; (*Kua tahuri ki te whakamāori*)
7. Ko te tauira whakamutunga; (*Kua whakatikatika haere*)
8. Kua tahuri ki te aromatawai i te tōtika me te whaihua o te whakamāori;

Koinei ngā āhuatanga o ngā paerewa whakamāori kōrero kua kōrerohia i tēnei wā, ā, taihoa kua āta whakaarohia ko ngā pūmanawa e whakatōkia ana, e whakapakaritia ana i roto i tēnei momo mahi, ā, kia mātua tae ki te wā e tirohia ai tēnei āhuatanga o te mahi, hei reira hui anō ai te rōpū whakamāori nei. He mahi nui tonu tēnei e wahaina ana e te rōpū nei me te whakaaro anō ki te āwangawanga i whakapuakina i te hui, arā, ko te nuinga o te hunga e whakamāori kōrero ana i tēnei wā, kua āhua taipakeke tonu. Me pēhea e taea ai te tō mai ngā reanga o muri mai ki roto i tēnei momo mahi i te mea kāore tēnei āhuatanga o te reo Māori e kaha ngākaunuitia ana, ka mutu, kāore e kaha whāia ana i runga i te whakaaro he mahi whai hua tonu tēnei ahakoa he mahi uaua tonu mēnā ka mahia i runga i te tōtika me te pai. Nō reira, ngā mihi nui ki te hunga i whakawātea mai i a rātou ki te pīkau i tēnei wāhanga o ngā mahi kawē i tō tātou reo ki roto i te tau rua mano, neke atu.

HE TAONGA
TE REO